

# PM umum RM100j bantuan banjir

BH - 20/12/2021 m/s:2

## Peruntukan bagi baiki kerosakan kediaman, salur RM1,000 bagi setiap ketua isi rumah terjejas

Oleh Rohaniza Idris dan Ruwaida Md Zain  
bhnews@bh.com.my

**Klang:** Datuk Seri Ismail Sabri Yaakob semalam mengumumkan peruntukan awal berjumlah RM100 juta bagi membaiki kerosakan kediaman dan infrastruktur akibat banjir, selain sumbangan RM1,000 kepada setiap ketua isi rumah yang terjejas susulan bencana itu.

"Ini peruntukan awal, jika tidak mencukupi mungkin kita akan tambah. Jumlah RM1,000 mungkin tidak mencukupi untuk membaiki kesan banjir ini, tetapi sekurang-kurangnya ia membantu," kata Perdana Menteri.

Beliau mengumumkan demikian pada sidang media selepas mesyuarat khas di Pejabat Daerah dan Tanah Klang, di sini semalam selepas meninjau operasi menyelamatkan dan melawat Pusat Pemindahan Sementara (PPS) Sekolah Kebangsaan (SK) Johan Setia serta SK Telok Gong.

Ismail Sabri yang pada September lalu mengumumkan kerajaan meningkatkan kadar bantuan wang ihsan daripada RM500 kepada RM1,000, berkata kerajaan akan mempercepatkan bayaran kepada penduduk di kawasan

terbabit banjir di Selangor dan negeri lain.

"Biasanya sumbangan itu akan dibayar selepas mereka pulang ke rumah, kita akan dapatkan maklumat mangsa daripada Pejabat Daerah Klang, kita akan segerakan (bayaran). Kita tidak akan tunggu lama, mereka balik perlu lakukan macam-macam. RM1,000 mungkin tidak cukup, tetapi ini untuk membantu membeli bahan asas diperlukan," katanya.

Pada masa sama, Perdana Menteri berkata, syarikat berkaitan pelaburan kerajaan (GLIC) dan syarikat berkaitan kerajaan (GLC) bersetuju menyalurkan sumbangan secara geran padanan dengan pihak kerajaan.

"Peringkat ini, selepas perbincangan dilakukan semalam (kelmarin), kita bersetuju menyediakan RM20 juta. Ini bermakna RM40 juta padanan kerajaan dengan GLIC dan GLC. Itu antara

bantuan akan diberikan segera bagi mengurangkan bebanan mangsa banjir ini," katanya.

Beliau turut mengumumkan cuti kecemasan kepada semua kakitangan awam yang terkesan akibat banjir dan menyarankan majikan swasta turut memberikan pekerja mereka cuti berbayar atau *paid leave* dengan tidak menolak peruntukan cuti tahunan dan gaji.

"Berapa lama cuti itu, kakitangan boleh berbincang dengan ketua jabatan masing-masing, termasuk kakitangan awam peringkat kerajaan negeri. Untuk kakitangan swasta, kita minta mereka berbincang dengan majikan. Saya tahu tiada peruntukan undang-undang berkaitan cuti banjir ini, namun ia boleh dilaksanakan atas sifat kemanusiaan," katanya.

Ismail Sabri juga menjelaskan, kerajaan Persekutuan melalui Kementerian Kesihatan (KKM)

akan menyediakan pasukan perubatan di pusat pemindahan terutama pusat pemindahan besar seperti PPS SK Telok Gong.

"Ada PPS yang saya lawati, tiada pasukan perubatan, tiada doktor dan jururawat. Jadi, pada mesyuarat hari ini (semalam), kita bersetuju menempatkan jururawat atau doktor di setiap PPS (besar). Kita juga akan bekalkan ubat-ubatan, cecair pembasmi kuman dan pelitup muka kerana kita tahu mereka berpindah dalam waktu tergesa-gesa.

"Paling penting, ada saringan COVID-19 melalui RTK Antigen dilakukan di setiap pusat pemindahan untuk memastikan semua mangsa yang berpindah selamat daripada jangkitan COVID-19," katanya menambah penugasan doktor dan jururawat di PPS terbabit akan ditentukan oleh KKM.

Perdana Menteri menjelaskan, data dikumpul Kementerian

Alam Sekitar dan Air menunjukkan hujan 24 jam di Selangor kelmarin menyamai taburan sebulan mengakibatkan air sungai melimpah hingga banyak kawasan dilanda banjir dan ia keadaan di luar jangka yang menyebabkan kekalutan.

"Tambah pula agensi penyelamat tidak menjangka air meningkat begitu cepat. Justeru, berlaku isu kelewatan bagi menyelamatkan mangsa banjir dan memberikan bantuan," katanya menjelaskan usaha menyelamatkan mangsa banjir di Selangor dan memberikan bantuan termasuk makanan sudah diselesaikan.

Katanya, berbeza dengan persiapan menghadapi banjir di negeri Pantai Timur, apa yang berlaku di Selangor memang tidak dijangka dan ia pertama kali membabitkan banyak kawasan.

"Hari ini (semalam), sudah arahan supaya siapakan keperluan untuk mangsa banjir di PPS, termasuk makanan, tempat tidur dan kemudahan tandas. Untuk makan malam hingga makan pagi esok (pagi ini) akan dibiayai kerajaan Selangor. Esok (hari ini) dan seterusnya melalui peruntukan Jabatan Kebajikan Masyarakat (JKM).

"Untuk tempat tidur, saya sudah arah diberikan tempat perlindungan bentuk *cubical box* dengan tilam dan selimut. Bagi tandas, saya sudah arah ditambah tandas mudah alih kerana tandas di PPS tak mencukupi dan kerja pembersihan dilakukan pihak berkuasa tempatan (PBT), kerana kebersihan penting," katanya.

Perdana Menteri memberi jaminan kelewatan bantuan seperti yang berlaku kelmarin tidak berulang dan semua bantuan sudah diarah disegerakan.



Ismail Sabri beramah mesra dengan kanak-kanak ketika melawat mangsa banjir di PPS SK Telok Gong, semalam.

(Foto BERNAMA)